

UPUTSTVO ZA PACIJENTA

*Prije upotrebe pažljivo pročitajte ovo uputstvo!
Uputstvo sačuvajte. Možda ćete željeti ponovo da ga pročitate.
Ako imate dodatnih pitanja, obratite se svom ljekaru ili farmaceutu.
Ovaj lijek je propisan lično Vama i ne smijete ga dati drugome.
Drugome ovaj lijek može da škodi, čak i ako ima znake bolesti slične Vašima.
Ako primjetite bilo koje neželjeno djelovanje, potrebno je obavijestiti ljekara ili farmaceuta.*



ATENZIO PLUS film tablete 80+12,5 mg
ATENZIO PLUS film tablete 160+12,5 mg
ATENZIO PLUS film tablete 160+ 25 mg
valsartan+hidrohlorotiazid

1. Šta je **ATENZIO PLUS** i za šta se koristi?
2. Prije nego počnete uzimati lijek **ATENZIO PLUS**
3. Kako uzimati lijek **ATENZIO PLUS**?
4. Moguća neželjena djelovanja
5. Kako čuvati lijek **ATENZIO PLUS**?
6. Dodatne informacije

1. Šta je **ATENZIO PLUS** i za šta se koristi?

ATENZIO PLUS film tablete sadrže dvije aktivne tvari zvane valsartan i hidrohlorotiazid. Obje tvari pomažu u kontroli povišenog krvnog pritiska (hipertenzije).

Valsartan pripada grupi lijekova poznatijoj kao „antagonisti angiotenzin II receptora“, koji pomažu u kontroli povišenog krvnog pritiska. Angiotenzin II je tvar koja sužava krvne žile u tijelu, čime uzrokuje povišenje krvnog pritiska. Valsartan djeluje tako da inhibira djelovanje angiotenzina II. To dovodi do toga da se krvne žile šire, a krvni pritisak pada.

Hidrohlorotiazid pripada grupi lijekova koji se nazivaju tiazidni diuretici (takođe poznati kao „tablete za mokrenje“). Hidrohlorotiazid povećava izlučivanje mokraće, čime se takođe snižava krvni pritisak.

ATENZIO PLUS se koristi za liječenje povišenog krvnog pritiska koji se ne može odgovarajuće kontrolisati samo jednom aktivnom tvari.

Povišen krvni pritisak povećava opterećenje na srce i arterije. Ako se to ne liječi mogu se oštetiti krvne žile u mozgu, srcu i bubrežima, što može dovesti do moždanog udara, zatajenja srca ili zatajenja bubrega. Povišen krvni pritisak povećava rizik od srčanog udara. Snižavanje krvnog pritiska na normalne vrijednosti smanjuje rizik od razvoja ovih bolesti.

2. Prije nego počnete uzimati lijek **ATENZIO PLUS** Nemojte uzimati **ATENZIO PLUS**

- ako ste alergični (preosjetljivi) na valsartan, hidrohlorotiazid, derivate sulfonamida (tvari hemijski srodne hidrohlorotiazidu) ili bilo koju od pomoćnih tvari u **ATENZIO PLUS** film tabletama
- ako ste trudni više od 3 mjeseca (takođe je bolje izbjegavati **ATENZIO PLUS** u ranoj trudnoći - vidjeti dio Trudnoća)
- ako imate tešku bolest jetre, razaranje malih žučnih kanala unutar jetre (bilijarna ciroza) dovodi do nakupljanja žuči u jetri (holestaza)
- ako imate tešku bolest bubrega
- ako ne možete mokriti (anurija)
- ako ste na dijalizi
- ako uprkos liječenju imate nizak nivo kalijuma ili natrijuma u krvi ili visok nivo kalcija u krvi
- ako imate giht
- ako imate šećernu bolest ili oštećenu bubrežnu funkciju i ako se liječite lijekom za sniženje krvnog pritiska koji sadrži aliskiren.

Budite posebno oprezni s **ATENZIO PLUS**

- ako uzimate lijekove koji štete kalij, suplemente kalija, zamjene za so koje sadrže kalij ili druge lijekove koji povećavaju količinu kalija u Vašoj krvi poput heparina.
- Vaš ljekar će možda trebati redovno kontrolisati količinu kalija u Vašoj krvi.
- ako imate niske vrijednosti kalija u krvi
- ako imate proljev ili jako povraćate
- ako uzimate visoke doze tableta za mokrenje (diuretika)
- ako imate tešku srčanu bolest
- ako bolujete od zatajenja srca ili ste imali srčani udar. Pažljivo slijedite uputstva Vašeg ljekara o početnoj dozi. Vaš će ljekar možda provjeriti funkciju Vaših bubrega.
- ako bolujete od suženja bubrežne arterije
- ako ste nedavno primili novi bubrež
- ako bolujete od hiperaldoosteronizma. To je bolest kod koje Vaše nadbubrežne žlijezde stvaraju previše hormona aldosterona. Ako se to odnosi na Vas, primjena **ATENZIO PLUS** se ne preporučuje.
- ako imate bolest jetre ili bubrega
- ako ste tokom uzimanja drugih lijekova (uključujući ACE inhibitore) iskusili oticanje jezika i lica uzrokovano alergijskom reakcijom koja se zove angioedem, obavijestite svog ljekara. Ako se navedeni simptomi pojave tokom uzimanja **ATENZIO PLUS**, odmah prestanite uzimati **ATENZIO PLUS** i nemojte ga više nikad uzimati. Takođe pogledajte dio 4. Moguće nuspojave.
- ako imate povišenu tjelesnu temperaturu, osip i bol u zglobovima, koji bi mogli biti znakovi sistemskog eritemskog lupusa (SLE, takozvana autoimuna bolest)
- ako imate šećernu bolest, giht, visoke vrijednosti holesterola ili triglicerida u krvi
- ako ste imali alergijske reakcije prilikom primjene drugih lijekova za sniženje krvnog pritiska ove grupe (antagonisti angiotenzin II receptora) ili ako imate alergiju ili astmu
- ako osjetite slabljenje vida ili bol u oku. To bi mogli biti simptomi povećanja pritiska u Vašem oku i može se dogoditi u roku od nekoliko sati do jedne sedmice od uzimanja **ATENZIO PLUS**. Ako se ne liječi, to može dovesti do trajnog gubitka vida. Ako ste ranije imali alergiju na penicilin ili na sulfonamid, kod Vas može postojati veći rizik od razvoja takvog stanja jer može uzrokovati povećanu osjetljivost kože na sunce.
- ako uzimate bilo koji od lijekova navedenih u nastavku koji se koriste za liječenje visokog krvnog pritiska:
 - ACE-inhibitor (na primjer enalapril, lizinopril, ramipril), naročito ako imate bubrežne tegobe povezane sa šećernom bolešću
 - aliskiren.

Ljekar Vam može provjeriti bubrežnu funkciju, krvni pritisak i količinu elektrolita (npr. kalijuma) u krvi u redovnim intervalima. Ako ste bilo što od ovoga odnosi na Vas, obratite se svom ljekaru. Pogledajte i dio "Nemojte uzimati **ATENZIO PLUS**".

ATENZIO PLUS može uzrokovati povećanu osjetljivost kože na sunce.

Djeca i adolescenti

Primjena lijeka **ATENZIO PLUS** kod djece i adolescenata (mlađih od 18 godina) se ne preporučuje.

Obavezno obavijestite svog ljekara ako mislite da ste trudni (ili planirate trudnoću). **ATENZIO PLUS** se ne preporučuje u ranoj trudnoći te se ne smije uzimati ako ste trudni više od 3 mjeseca, jer može ozbiljno štetiti Vašem djetetu ako se koristi u toj fazi (vidjeti dio Trudnoća).

Uzimanje drugih lijekova

Molimo da obavijestite svog ljekara ili farmaceuta ako uzimate ili ste nedavno uzimali druge lijekove, pa i one koji se nabavljaju bez recepta.

Uzimanje **ATENZIO PLUS** s nekim drugim lijekovima može uticati na terapijsko djelovanje. Može biti potrebno promijeniti dozu, poduzeti druge mjere opreza ili u nekim slučajevima prestati uzimati jedan od lijekova.

To se posebno odnosi na sljedeće lijekove:

- litij, lijek koji se koristi za liječenje nekih vrsta psihijatrijskih bolesti
- lijekove ili tvari koji bi mogle povećati količinu kalija u Vašoj krvi. Oni uključuju dodatke kalija ili zamjene za so koje sadrže kalij, lijekove koji štete kalij i heparin.
- lijekove koji bi mogli smanjiti količinu kalija u Vašoj krvi, kao što su diuretici (tablete za mokrenje), kortikosteroidi, laksativi, karbenoksolon, amfotericin ili penicilin G
- neki antibiotici (rifamicinska grupa antibiotika), lijekovi koji se primjenjuju za sprječavanje odbacivanja organa nakon transplantacije (ciklosporin) ili antivirusni lijekovi koji se koriste za liječenje HIV infekcije/AIDS-a (ritonavir). Ovi lijekovi mogu pojačati djelovanje **ATENZIO PLUS**.
- lijekove koji bi mogli uzrokovati "torsades de pointes" (nepravilne otkucaje srca), kao što su antiaritmici (lijekovi koji se primjenjuju za liječenje srčanih tegoba) i neki antipsihotici
- lijekove koji bi mogli smanjiti količinu natrija u Vašoj krvi, kao što su antidepresivi, antipsihotici, antiepileptici
- lijekove za liječenje gihta poput alopurinola, probenecida, sulfipirazona
- terapijske suplemente vitamina D i kalcija
- lijekove za liječenje šećerne bolesti (oralni lijekovi kao što su metformin ili inzulini)
- druge lijekove za snižavanje krvnog pritiska uključujući metildopu, ACE inhibitore ili aliskiren
- lijekove za povišenje krvnog pritiska, poput noradrenalina ili adrenalina
- digoksin ili druge glikozide digitalisa (lijekove za liječenje srčanih tegoba)
- lijekove koji mogu povišiti nivo šećera u krvi poput diazoksida ili beta blokatora
- citotoksične lijekove (koriste se za liječenje maligne bolesti) poput metotreksata ili ciklofosfamida
- lijekove protiv bolova kao što su nesteroidni protuupalni lijekovi (NSAID), uključujući selektivne inhibitore ciklooksigenaze-2 (Cox-2 inhibitori) i acetilsalicilatnu kiselinu >3 g
- lijekove za opuštanje mišića poput tubokurarina
- antiholinergike (lijekovi za liječenje raznih poremećaja kao što su grčevi probavnog sistema, grč mokraćnog mjehura, astma, morska bolest, mišićni spazmi, Parkinsonova bolest, te kao pomoć anesteziiji)
- amantadin (lijek koji se koristi za liječenje Parkinsonove bolesti te za liječenje ili sprječavanje određenih bolesti uzrokovanih virusima)
- holestiramin iolestipol (lijekovi koji se uglavnom koriste za liječenje visokih nivoa lipida u krvi)
- ciklosporin, lijek koji se koristi kod presađivanja organa kako bi se izbjeglo odbacivanje organa
- alkohol, lijekove za spavanje i anestetike (lijekove s djelovanjem uspavljanja ili smanjivanja boli koji se koriste, primjerice, tokom operacije)
- kontrastna sredstva koja sadrže jod (tvari koje se koriste za preglede snimanjem).

Ljekar će Vam možda morati promijeniti dozu i/ili poduzeti druge mjere opreza: ako uzimate ACE-inhibitor ili aliskiren (vidjeti takođe informacije pod naslovima "Nemojte uzimati **ATENZIO PLUS**" i "Upozorenja i mjere opreza").

Uzimanje hrane i pića s **ATENZIO PLUS**

ATENZIO PLUS možete uzimati sa ili bez hrane.

Izbjegavajte uzimanje alkohola prije nego porazgovarate s Vašim ljekarom. Alkohol može izazvati veći pad krvnog pritiska i/ili povećati rizik od omaglice ili nesvjestice.

Trudnoća i dojenje

Prije nego što počnete uzimati bilo koji lijek, obratite se za savjet svom ljekaru ili farmaceutu.

Trudnoća

Obavezno obavijestite svog ljekara ako mislite da ste trudni (ili planirate trudnoću). Vaš ljekar će Vas u pravilu savjetovati da prestanete uzimati **ATENZIO PLUS** prije trudnoće ili čim saznate da ste trudni te će Vas savjetovati da uzmete drugi lijek umjesto **ATENZIO PLUS**. **ATENZIO PLUS** se ne preporučuje u ranoj trudnoći te se ne smije uzimati ako ste trudni više od 3 mjeseca, jer može ozbiljno štetiti Vašem djetetu ako se koristi nakon trećeg mjeseca trudnoće.

Dojenje

Obavijestite svog ljekara ako dojite ili planirate dojiti.

ATENZIO PLUS se ne preporučuje majkama koje doje, a ako želite dojiti ljekar Vam može odabrati drugu terapiju, posebno ako je Vaše dijete novorođenče ili je prijevremeno rođeno.

Upravljanje vozilima i mašinama

Prije nego počnete voziti automobil, koristiti alate ili mašine te obavljati druge aktivnosti koje zahtijevaju koncentraciju, svakako morate znati kako **ATENZIO PLUS** utiče na Vas. Kao i mnogi drugi lijekovi za liječenje povišenog krvnog pritiska, i **ATENZIO PLUS** u rijetkim slučajevima može uzrokovati omaglicu i uticati na sposobnost koncentracije.

3. Kako uzimati lijek **ATENZIO PLUS**?

ATENZIO PLUS uvijek uzimajte tačno onako kako Vam je propisao ljekar. To će Vam pomoći u postizanju najboljih rezultata i smanjenju rizika od nuspojava. Ako niste sigurni, obratite se svom ljekaru ili farmaceutu.

Osobe s povišenim krvnim pritiskom često ne osjećaju nikakve znakove ovog problema. Mnogi se osjećaju kao i obično. Stoga je važno da obavljate planirane posjete ljekaru, čak i ako se dobro osjećate. Vaš ljekar će Vam tačno reći koliko tableta **ATENZIO PLUS** trebate uzimati. Ovisno o tome kako reagujete na liječenje, Vaš ljekar može predložiti višu ili nižu dozu.

Uobičajena doza **ATENZIO PLUS** je jedna tableta na dan.

Nemojte mijenjati dozu ili prestati uzimati tablete bez savjetovanja s Vašim ljekarom. Ovaj lijek se treba uzimati svaki dan u isto vrijeme, uglavnom ujutro.

ATENZIO PLUS možete uzimati zajedno s hranom ili bez nje. Tabletu popijte s čašom vode.

Djeca

Primjena valsartana se ne preporučuje kod djece zbog nedostatka dokaza o efikasnosti i sigurnosti primjene.

Ako uzmete više ATENZIO PLUS film tableta nego što biste trebali

Ako uzmete više od preporučene doze, potrebno je da odmah obavijestite svog farmaceuta ili ljekara. Ukoliko osjetite tešku omaglicu i/ili slabost, lezite i zatražite savjet Vašeg ljekara bez odlaganja.

Ako ste zaboravili uzeti ATENZIO PLUS

Ako ste zaboravili uzeti dozu, uzmite čim se sjetite. Međutim, ako je uskoro vrijeme za Vašu sljedeću dozu, preskočite propuštenu dozu. Ne udvostručujte dozu kako biste nadoknadili propuštenu dozu.

Ako prestanete uzimati ATENZIO PLUS

Prekid liječenja **ATENZIO PLUS** film tabletama može pogoršati Vaš povišeni krvni pritisak. Ne prekidajte s uzimanjem lijeka, osim ako Vam to ne kaže Vaš ljekar.

U slučaju bilo kakvih nejasnoća ili pitanja u vezi s primjenom ovog lijeka, obratite se svom ljekaru ili farmaceutu.

4. Moguća neželjena djelovanja

Kao i svi drugi lijekovi, **ATENZIO PLUS** može uzrokovati nuspojave, iako se one neče javiti kod svakoga. Ove nuspojave se mogu javiti s određenom učestalošću koja se definiše na sljedeći način:

- vrlo često: javljaju se kod više od 1 na 10 korisnika
- često: javljaju se kod 1 do 10 na 100 korisnika
- manje često: javljaju se kod 1 do 10 na 1000 korisnika
- rijetko: javljaju se kod 1 do 10 na 10 000 korisnika
- vrlo rijetko: javljaju se kod manje od 1 na 10 000 korisnika
- nepoznato: učestalost se ne može procijeniti iz dostupnih podataka.

Neke nuspojave mogu biti ozbiljne i zahtijevaju hitnu ljekarsku pomoć:

Odmah morate otići ljekaru, ako osjetite simptome angioedema, poput:

- oticanja lica, jezika ili grla
- otežanog gutanja
- koprivnjače i otežanog disanja.

Ako osjetite bilo koji od navedenih simptoma, odmah prekinite uzimati **ATENZIO PLUS** i javite se svom ljekaru (također vidjeti dio 2. „Budite posebno oprezni s **ATENZIO PLUS**“).

Ostale nuspojave uključuju:

Manje često

- kašalj
- nizak krvni pritisak
- ošamućenost
- dehidracija (sa simptomima žeđi, suhих уста i jezika, rijetkog mokrenja, tamno obojene mokraće, suhe kože)
- mišićna bol
- umor
- drhtanje ili ukočenost
- priviđenja
- buka (npr. zviždanje, zujanje) u ušima.

Vrlo rijetko

- vrtoglavica
- proljev
- bolovi u zglobovima.

Nepoznato

- otežano disanje
- jako smanjeno mokrenje
- sniženje nivoa natrija u krvi (što može dovesti do umora, smetenosti, trzanja mišića i/ili konvulzija u težim slučajevima)
- sniženje nivoa kalija u krvi (ponekad sa slabošću mišića, grčevima mišića, nenormalnim srčanim ritmom)
- sniženje nivoa leukocita u krvi (sa simptomima poput povišene tjelesne temperature, infekcija kože, grlobolje ili čireva u ustima zbog infekcija, slabosti)
- povišenje nivoa bilirubina u krvi (što može u težim slučajevima izazvati žutilo kože i očiju)
- povišenje nivoa azota iz uree u krvi i kreatinina u krvi (što može ukazivati na poremećenu funkciju bubrega)
- povišenje nivoa mokraćne kiseline u krvi (što može u težim slučajevima izazvati giht)
- sinkopa (nesvjestica).

Sljedeće nuspojave su bile zabilježene samo s valsartanom ili hidrohlorotiazidom:

Valsartan

Manje često

- osjećaj da Vam se vrti
- bol u trbuhu.

Nepoznato

- stvaranje mjehura na koži (znak buloznog dermatitisa)
- kožni osip sa ili bez svrbeža zajedno s nekim od sljedećih znakova ili simptoma: povišena tjelesna temperatura, bol u zglobovima, bol u mišićima, otečeni limfni čvorovi i/ili simptomi nalik gripi
- osip, ljubičasto-crvene pjege, povišena tjelesna temperatura, svrbež (simptomi upale krvnih žila)
- sniženje nivoa trombocita u krvi (ponekad s neuobičajenim krvarenjem ili modricama)
- povišenje nivoa kalija u krvi (ponekad s grčevima mišića, nepravilnim srčanim ritmom)
- alergijske reakcije (sa simptomima poput osipa, svrbeža, urtikarije, otežanog disanja ili gutanja, omaglice)
- oticanje uglavnom lica i grla, osip, svrbež
- porast vrijednosti pokazatelja jetrene funkcije
- sniženje nivoa hemoglobina i sniženje udjela eritrocita u krvi (što oboje može u težim slučajevima dovesti do anemije)
- zatajenje bubrega
- nizak nivo natrija u krvi (što može dovesti do umora, smetenosti, trzanja mišića i/ili konvulzija u težim slučajevima).

Hidrohlorotiazid

Vrlo često

- nizak nivo kalija u krvi
- povišenje lipida u krvi.

Često

- nizak nivo natrija u krvi
- nizak nivo magnezija u krvi
- visok nivo mokraćne kiseline u krvi
- osip sa svrbežom i druge vrste osipa
- smanjeni apetit
- blaga mučnina i povraćanje
- omaglica, nesvjestica pri ustajanju
- nemogućnost postizanja ili održavanja erekcije.

Rijetko

- oticanje i plikovi na koži (zbog povećane osjetljivosti na sunce)
- visok nivo kalcija u krvi
- visok nivo šećera u krvi
- šećer u mokraći
- pogoršanje dijabetičkog metaboličkog stanja
- zatvor, proljev, nelagoda u trbuhu ili crijevima, poremećaji jetre koji se mogu pojaviti zajedno sa žutilom kože i očiju
- nepravilni otkucaji srca
- glavobolja
- poremećaji sna
- tužno raspoloženje (depresija)
- sniženje nivoa trombocita u krvi (ponekad s krvarenjem ili modricama pod kožom)
- omaglica
- trnci ili obamrlost
- poremećaj vida.

Vrlo rijetko

- upala krvnih žila sa simptomima poput osipa, ljubičasto-crvenih pjega, povišene tjelesne temperature (vaskulitis)
- osip, svrbež, koprivnjača, poteškoće u disanju ili gutanju, omaglica (reakcije preosjetljivosti)
- teška kožna bolest koja uzrokuje osip, crvenilo kože, pojava plikova na usnama, očima ili ustima, ljuštenje kože, groznica, toksična epidermalna nekroliza
- osip na licu, bolovi u zglobovima, mišićni poremećaj, povišena tjelesna temperatura (eritemski lupus)
- teški bolovi u gornjem dijelu trbuha (pankreatitis)
- otežano disanje s povišenom tjelesnom temperaturom, kašljanje, piskanje, gubitak daha (respiratorni distres uključujući pneumonitis i plućni edem)
- povišena tjelesna temperatura, grlobolja, učestaliye infekcije (agranulocitoza)
- bijedilo kože, umor, nedostatak zraka pri disanju, tamna mokraća (hemolitička anemija)
- povišena tjelesna temperatura, grlobolja ili ulceracija u ustima zbog infekcija (leukopenija)
- zbunjenost, umor, trzanje mišića i spazam, ubrzano disanje (hipohloremijska alkalozia).

Nepoznato

- slabost, podljevi i učestale infekcije (aplastična anemija)
- uveliko smanjeno stvaranje mokraće (mogući znakovi poremećaja ili zatajenja bubrega)
- slabljenje vida ili bol u očima uzrokovan visokim pritiskom (mogući znakovi akutnog glaukoma zatvorenog ugla)
- osip, crvenilo kože, mjehuri na usnama, očima ili u ustima, ljuštenje kože, povišena tjelesna temperatura (mogući znakovi multiformnog eritema)
- mišićni spazam
- povišena tjelesna temperatura (pireksija)
- slabost (astenija).

Prjavljivanje sumnje na neželjena dejstva lijeka

U slučaju bilo kakvih neželjenih reakcija nakon primjene lijeka, potrebno je obavijestiti Vašeg ljekara ili farmaceuta. Ovo podrazumijeva sve moguće neželjene reakcije koje nisu navedene u ovom uputstvu o lijeku, kao i one koje jesu.

5.Kako čuvati lijek ATENZIO PLUS?

ATENZIO PLUS morate čuvati izvan dohvata i pogleda djece.

Čuvajte **ATENZIO PLUS** na temperaturi do 25°C u originalnom pakovanju.

Rok trajanja

3 godine. Istek roka upotrebe odnosi se na zadnji dan navedenog mjeseca.

ATENZIO PLUS film tablete ne smijete primijeniti nakon isteka roka trajanja!

6.Dodatne informacije

Sastav

ATENZIO PLUS film tablete 80+12,5 mg

Svaka film tableta sadrži 80 mg valsartan anhidrata i 12,5 mg hidrohlorotiazida.

ATENZIO PLUS film tablete 160+12,5 mg

Svaka film tableta sadrži 160 mg valsartan anhidrata i 12,5 mg hidrohlorotiazida.

ATENZIO PLUS film tablete 160+25 mg

Svaka film tableta sadrži 160 mg valsartan anhidrata i 25 mg hidrohlorotiazida.

Pomoćne supstance: mikrokrystalna celuloza, kopovidon, krosopovidon, talk, koloidni silicij dioksid, natrijum laurilsulfat, magnezijum stearat.

Film: Opadry II pink (**ATENZIO PLUS 80+12,5 mg** i **ATENZIO PLUS 160+12,5 mg**);

Opadry II orange (**ATENZIO PLUS 160+25 mg**); prečišćena voda.

Sadržaj pakovanja

30 (3x10) tableta od 80+12,5 mg u blister pakovanju, u kutiji.

30 (3x10) tableta od 160+12,5 mg u blister pakovanju, u kutiji.

30 (3x10) tableta od 160+25 mg u blister pakovanju, u kutiji.

PROIZVOĐAČ (administrativno sjedište), PROIZVOĐAČ GOTOVOG LIJEKA (mjesto puštanja lijeka u promet) i NOSILAC ODOBRENJA ZA STAVLJANJE LIJEKA U PROMET

ZADA Pharmaceuticals d.o.o.

Donji Bistarac b.b.

75 300 Lukavac

Način izdavanja

Lijek se izdaje na ljekarski recept u apoteci.

Broj i datum rješenja o dozvoli za stavljanje gotovog lijeka u promet

ATENZIO PLUS film tablete 30x(80+12,5 mg): 04-07.3-2-4706/16 od 20.04.2017.

ATENZIO PLUS film tablete 30x(160+12,5 mg): 04-07.3-2-4707/16 od 20.04.2017.

ATENZIO PLUS film tablete 30x(160+25 mg): 04-07.3-2-4708/16 od 20.04.2017.

SPUP00412 V2